

GOSPEL TANGKOU

(Gospel Herald)

Issue No. 7

Volume : XXXIV

September

2019

UPA TRAINING ZOH HITA



2019-2020 KUM THUPI

“Lungkelou in Mangpa nna sem vai...”

Jeremiah 12:5

EDITOR:

Rt. Rev. Dr. S.K MANLUN

EDITORIAL BOARD

Founder Editor:

Rev. M.Hauzalian
Mobile No - #09275259138
E-mail :lianmanlund@yahoo.com

Editor:

Rt.Rev. Dr. S.K. Manlun
Mobile No - +91 9612152332
E-mail :melchqtrs@gmail.com

Joint Editor:

Upa S. Zamkhanpau
Mobile No- +91 9612574232

Assistant Editor:

Rev. Rtd. S. Nengkhanmang
Mobile No- +91 8974139641

Contributing Editor:

1. Rev. Dr. Hangminthang,
Director of Ministries
Mobile No. +919612997858
2. Rev. Thangliankham,
Director of Missions
Mobile No. +9862830905
3. Divisional Superintendent teng

Design & Setting:

Mr. Khamkhanhau
Mobile No. +918974955366
E-mail : munluohaupu@gmail.com

Circulation Manager:

1. H. Khaikhogin
Mobile No - +919862133422
2. Dongzakam
Mobile No. +919612198903

A SUNG A THU UMTE

Editorial	01
A Hunbi Achin chiengin	02
Itna	07
Chouna (Challenges)	09
Noah hun lai a tuilet...	11
Homo Sexuality...	13
Jesu sui minam thumte	20
Report tuomtuom...	22

Patron Member ₹.1500/-
Kum khat lah man:
Khut ah - ₹.150/-
Dah ah - ₹.200/-

Editor dawkan apat

Amasa in MELC kum 37th mel hing musah Mangpa Pasion min kaphat a, hattuom misiengthoute na bawn un Jesu Khrist min in chibai.

I hattuum MELC 37 chinna ilop hun un ginna jieha tamtan tung ihi uhchi manghil sih vai. Mangpa'n thupi tahin tamtan ahing pui a zong ahing nuasie sih ding a, I Pawlpi un maban ah guolzawl na tampi amu nalai ding khu ithumna hi leh kachi hi.

Tukum in MELC huongsung ah kipah tah mai in "MELC DAY" imang chiet ua, office lam apat a order jong hilou in Mangpan hattuumte lungsim ah kitha lawpna hingtung sah in akoima pou in imang chiet uh ka ngaituo chieng in lamdang kasa hi. Mangpan ihattuom angve a Hagau leh tahsa ah haltha na leh kipahna ang tung sah in kamu a tua jieha in Mangpa min kaphat hi.

Eima hatna a tamtan tung ihi sih ua, I tung na ding ua lampi hing na sielsahte leh thupina gam hing na jotsan te jieha kum 2019 tan tung ihi uhi. Paul in Ephesate, 2:19-22 a " Tu in vang mikhuol leh gamdang mi na hinawn sih ua, misiengthoute toh khoutuol khat leh Pasion innkuonte nahi zawta uhi. Sawltahte leh guolneite suong-phum tunga noute ahing lamtou hi, Jesu Khrist khu aninga suong poimawh pen ahi. Ama ah tuami inn kilam jousie a unpi in kituotahin a sutuo a, tua chin A hattuum siengthou a khangtou hi.



Ama ah noute jong hagau ah Pasion tenna dinga lepkhawm nahi uhi. Hattuom khu ginna in buldet tahin a khangtou a, Jesu aninga suong poimawh pen ahi". A ning a suong phamtuom khu eite a ding a dawngkawt hing honsah pa ahia, tuni chieng tan ah MELC pawlpi a ding a ibangkim a bangkim ahing hita hi. Hun peisa a imi masate nasepte iet chiang in amaute nasep na gaa tukhang ah Pasain guolzawl na tampi muthei in a um hi. Kum bangjat e khat peita a, semtuten athaman uh halaw lah ding office ah umlou, a lampi umsun thumna ahia, Pasion thupina ding ha bangjat e khat halawte phummang a aumlaite ka ngaituo a hasiet huai jong kasa hi. Tunin Jesu Khrist a ning a suong phatuom ei ding in phatuom, a hausatna chikim toh ihattuom hing guoljawl in semtute/workers ten ha beisang a amauh Account Number chiet a asepmann uh halaw lut thei jiah jiah ichi chieng in "**Aw Mangpa eidin hoi hina e**" chi lou ngal gen ding kathei sih.

Tam kum 37 chinna khu atuom nakhat a um a, ilamkai masa uh Rev.Ginzapau leh Rev Khupdoukham te lamkaina nuai ah 15th September 1982 in ihattuom ana ding a, lamkai masa siempite hatuom a dinga gentheina leh hasatna ana thuoh nate zieh in zatatna ipie uhi. Tuahun lai toh tuhun toh tehkah lei, Pasion guolzawlina thupi tah mai imu uhi chi lei zong igenkhiel sih ding hi. Keima ngaisutna ah ihattuam sung uh ka ngaituo chieng in *Mangpa Israelte sun a meipi leh zan a*

meikuong a puipa, a kikhel ngailou Mangpa'n MELC te guolzawlina tampi toh tutan ahing pui hi chi kamu hi.

Pasion Manggamna tuni tan dawng chieng a **lungkelou** a isepte in mailam huna imu khahlou khangsawnte leh mi zatamte tung a Khrist thuguh chitu ihi uhi chi ang chiensah hi. Gim leh tawl khosah lou a Mangpa maipha suina leh athu itangkoupi ten mi asang aza lailung sukhahna hing hiding in theitawp suo ding in iki hanthawn in iki chiel uhi.

A HUNBI ACHIN CHIENG IN

(Galatia 4:4-5.)

~ **Pastor Khupdokhen,**
Bengaluru

A hunbi ahing chin tah chiengin asanggam ten adeilou uh Tv. Joseph khu Aigupta gam Governor suoh lel hi. Siemchilbu 41:41.

A hunbi ahing chin tah chiengin, a sanggam ten zawlta chia anaw khiet uh Jephthah khu Israelte lamkai lienpen suoh lel hi. Vaihawmte 11:1-11

A hunbi ahing chin tahchiengin, taga nungah apaneu Mordekai in akep Esther jong Kumpinu suoh lel hi. Esther 2:17

A hunbi ahingtun tah chiengin, Ruth, meithai taganu jong Mihau-sapa zi suoh lel hi. Ruth 4: 1-ff

A hunbi ahing chintah chiengin Pasion in eite hing tan khie dingin atapa tang khat Jesu Khrist leitungah ahing sawl hi. Phillipite 2:5-7.

Tunitan chieng dong ahepina toh hingkem le hing umpi jing I Mangpa Jesu Khrist min in chibai.

Hahsatna, lungkhamna leh mangbatna leh gimgentheina chituom tuom lah apatsa hing veng jing I bieh I Mangpa Jesu Khrist min loupi phat in umjing ta hen.

Bangteng hileh, tunia a ithulu ding uh pen, A HUN A KICHIN TAH CHIENGIN, chi ahi dinga, I Laisiengthou sung pansan a, Pasion in ahun aki chin tahchienga a nasepdan pansan in igen ding uhi. Laisiengthou, Siemchilbu 41:41 na

Gospel Tangkou September 2019

mun i sim ding ua, adangte pen a thu in igen tho ding uhi. I mu tah uleh ana en chiet unlen, keiman hing sim vang.....A thusiengthou isimte Mangpan itan chiet ua dingin Thupha hing piehsah ta hen. Thungetna nei vai.

I theisa chiet mabangin, Joseph khu Jakob tate lah a, a sawm le khatna ahi a, anu min khu Rakel ahi. Ama tunga asanggam pasal mi 10 te khu gamlah a ganching in a um ua, ama leh anaupa Benjamin khu inn ah aum uhi. Joseph khu lim le mel hitaleh, gamtatdan leh khohei dan, ham le pau dan ah mi kizen le fel mama ahi ban ah, a pan a it mama jiehin Kot puanah pawl khat apie hi. Tami silpieh jong asanggam ten aza da mama uh ahi hi. Zan khat mang lamdang tah khat a nei a, a manga Ahsi 11 te amai a kuun ahidan uh leh Ni le Ha jong amai a kuun uh ahi dan agen hi. Tami mang khu a sanggam pasal ten azada ma ma ua, Joseph tunga Phuba lah tei tei ahing som ta moh uhi. Tuachiin , hun hing peitou jel in, ni khat Joseph khu apa Jakob in gamlah a, a ute ganchinna a, vapei a, ann va puoh dingin a sawl ta hi. Tuachiin, a Uten Joseph amu tah un, mangneipa hing pei e, tu in that doh vai e, eite ama masanga kuun dinga ang gen mama, achi ua, Joseph khu aman ua, avua ua, a Utahpen uh Reuben in aha kham

seng jieha , that lou in, kuoh sung ah a khie ta uhi. A hing la khie kie ua, summet bawl te kungah dangka sawmthum in azuoh ta uhi. Shi na ching hial Solna, lungkhamna leh mangbatna te hing tuoh tou tou in, atopna ah Pasion in Aigupta gam pumpi a, thuneina lianpen, Kumpipa nuai a chet in ahing kaisang sah ta hi, Halleluia !!! Joseph Governor a ahing pan theina dinga asil tuoh tou tou teng, tam ma ma va, ahihang in aman Pasion a muonga, lampiel kha mong mong lou hi. Ki ngaisietna ahau tham ding hi. Ka neu lai a ka NUN ahing na shisan, tua ka sanggam te khuta, gentheina ka thuoh, ka Pu pa Potipher zi in zuau thu a, Jail(Thong) inn a ang khum, tua Jail sung a shi den di ka ta ve... chi in ki ngaisietna ahau ma ma ding hi. Hinanleh khum hahsatna jousie khu Governor a ahing panthei na dinga kalbi, alampi tot tou tou te ana hi zaw hi.

Tami tangvalpa Joseph tunga, sil hahsa tah tah tungsah a, lamsang tou leh domsang tou Pasion pen tunia eite bieh Pasion jong ahi nalai hi. Nang le keijong igin umna leh idihtatna te jiehin, hasatna tuom tuom ituoh kha ma ding uhi. Kei mama jong ka kam ham di ahing kiphuoh sah a, ka gen loupi, agen in ahing kithang sah

Gospel Tangkou September 2019

uhi. Hinanleh jong tami hahsatna jousie pen Pasion lapsangna dinga, hagualam a kalbi khat ahing hi tou tou zaw hi. Tami hahsatna te ituoh sunga, ham khielthei leh gamtat khiel thei ahi a, hinanleh tamteng zousie ituoh galkai nuo chienga, Pasion in eia dinga akoi bang din mun ahei khat ana om ngei ngei ding hi. Khumi Pasion in mizousie a dinga akoi chitchiet dinmun na tun masang in, na kam sip sah in, na hena pai mang in, phuba lah som sin, Pasion deilam bang ahei chi lunggul kawm in, thu ngen in. A hun angchin tah chienga, nang omna ding mun zatathuai leh kilawm Pasion in ahing koisah na mun ah, neu nou khat gin um louna leh thumanlouna te jiehia, midang khat in aluo khah ding zau huai hi. “Tuajiehin, ahuntah a noute ahing dopsang(pahtoi) theina dingin Pasion khut hattah nuo ah ki ngaingiem un” **(1Peter 5:6).cf. Gal.6:9; 2Cor.4:16.**

Joseph banga, ahun ang chin tah chienga Pasion lapsang na nga meithainu **Ruth** tanchin en kia jual vai. Ama nu khu Naomi tapa Kilon zi ahi hi. Naomi le apasal Elimelek khu Israel mi ahi ua, Bethlehem, Jesu pienna mun a teng ahi uhi. Bethlehem a kial ahing tun tah in, Moab gam ah atai ua, tua mun ah atapa tegel Mahlon leh Kilon in Moab nungahte zi in anei ta uhi. Bangteng hileh Judate dan ah vang, Gamdang mite toh kiteen

phallou leh kham bihbeh ahi. Adieh in Amor mite, Ammon mite leh Moab mite khu Judate Pasion biehma mun a zong lut phal lou ahi. (Danpiehnina 23). A zite uh min khu Orpah leh Ruth ahi hi. Tuachin hun hing pei jel in, Naomi pasal Elimelek ahing shita a, asot lou in atapa tegel jong ahing shi ta uhi. Tami hun laitaha Naomi lungkham dan gen seng lou ahi. Naomi lungke ma ma in, a gam lam uh Israel a kile kia ding a hing som ta hi. Tua hun in , a moute gel in a innpi nu uh jui asom ta uhi. Naomi in jong hing jui sih un chi in a khie a, hinanleh Ruth pen akhie jou tasih ahi. Tuachiin , tami mou leh innpinu khu Isaael gam Bethlehem ahing tung ta ngei ua, lou le inn lah nei lou ahi jie un, genthei tah in hinkhua ahing jang tou ta uhi. Naomi lah teeh ta ahi chieng in nasem jounon lou ahi a, a mounu Ruth nasepsa ngah a om mai ahi ta hi. Tuachin a inpinu Naomi thu amanga, Naomi thuhil bang bangin , Ruth in nna ahing sem tou tou a, athu manna, agin omna leh chitahna te jie in, mihausapa Boaz zi ahing suoh thei a, Jesu khangthuu kisutna a jong suot khah in ahing um tahi. Ruth mihoina leh chitahna te khu mihausapa Boaz kung ana tung khin tham ta **hi (Ruth 2:10-12).** Dana, kana, lungkham mangbatna tampi thuoh kawma, igin omna hasuo lou a, Pasion adinga pang

Gospel Tangkou September 2019

vevo, Pasion khut a kiluoi bembom te khu, ahun ahing kichin tah chiengin Pasion in lamsang tei tei hi. Nang le kei a ding in jong Pasion in alem guot hun khat ahing tung ngei dinga, khumi hun chienga, ei tan dinga kikoi dinmun khu midang koi ekhat in atan lou a, eima ma in idin mun di iki luo thei pai na dingin pang ve vo vai.

Tuin Jephthah thu tamlou gen vai. Tami thu igen na ding un Laisiangthou **Vaihawmte 11:1-11** tan hoitah nou a sim angai hi. Tang nina ah, “Nangpen numei tuom tapa na hi jiehin, ipa inn sungah gou na luo thei sih ding hi” achi uhi. Jephthah khu mi hat leh mi hangsan ahi hi. Apa min Gilead ahi a,ateenna mun uh khu Gilead gam akichi hi. Gilead in kizua numei nu toh tapa khat Jephthah kichipa anei nua in, zi tha anei a, tapa tampi anei kia hi. Bangteng hi leh Jephthah khu U-Pa pen, ahi hi. Hinanleh anu tha taten, a U-pa uh Jephthah kungah, nang numei tuom tapa na hi jiehin, ipa gou na luo thei sih ding achi khum ban uah, inn a kipatin a notdoh ta uhi. Gilead gam a Vaihawm-Upa te jousien athu agen ua, hinanleh Jephthah khu nohdoh di chi ahi thou thou hi. Jephthah thugen, “Kei na hing muda ua, ka pa inn a patsa na hing nawdoh uh hilou ahiei mah?” achi na ah khun, vaihawm upa ten jong Jephthah amu da uh china ahi mai hi. Tambangteng ahi vang in,

lunggel siempa Pasion hing vai hawm in, Jephthah talent, ahathna leh a hangsanna te phatuom taha zah a aup thei na dingin, Gilead mite khu Ammon miten adou sah ta hi. Tuachi in, Gilead mite lah ah gallamkai ding mi aki sui maw mama ta ua, mi hat leh hangsan Jephthah khu, a nawdoh sa uh hinanleh hatkia dingin ahing thukim ta uhi. Tuachiin, Jephthah khu a han kia ua, gallam kai in ahing pang a, amel ma uh Moab te azou ta hi. Tami mun lai tah ah, nang leh kei hi talei, “Na unsieng un shi bei le uchin ka chi ve, ki thutuoh tah a, ka pa inn apatsa na hing del doh uh hilou maw, bang na jumaw na ula ? Hing pei mama sih vang, Ammon mite lel a, na hing shi gam chieng ua, alopna guolnop thupitah a ka bawl di hina lai e,” chi in ina dawng ding uhi. Ahivangin, Jephthah in tambang lungsim sia anei het sih a, vaihawm upate toh thuchiem dettah abawl nua un, gal ava zaw pi ta hi.

I unau, isanggam,imi-isa leh ihattuom ten ang muda ua, hasiet huai tah a ahing bawl tah u leh jong ha se lou ding, thangpai lou ding, phuba lah som lou ding, engsietna lungsim nei lou ding china ahi. Tuabang lungsim siengthou inei chieng un, ihasietna, iguallelna, imuolphou na te jousie khupkhel lam ah Pasionin nna ahing sem dinga,

Gospel Tangkou September 2019

khumte apatsa letna, lalna, guolzawna, leh Pasion dopsangna chituom tuom lam tuom tuom ah imu ngei ngei ding uh hi.

Pasion in Jephthah a dopsang na ding hun ahing tun a, Gilead gam pumpi a vai hawm ding a, ahat kia ma bangin, eite jong lungsim siengthou tah toh Pasion na ngah jing pou lei, A mite kana leh gentheina manghil ngailou Pasion in guolzawna loupitah itan theina dingin lampi tha ahing honpieh ngei ngei ding hi. Tuin nang le kei

jong ahun, Pasion lemgel mihing ten ithei lou uh, ahunbi ahing tun chienga athupha inga theina dingin, lungsim kisakhawl thei dingin, Mangpan hing umpi chiet ta hen. Amen.

Pasion in ahun buching ta e achi chienga, ahing dopkang theina dingin, Pasion deilam bang ahei chi sui thei dingin, eite mimal khatchiet athuneipa Pasion in thupha hing pe chiet ta hen.

Amen.

THEISAHKIANA

MELC in thu kizahna inei sun sun uh **GOSPEL TANGKOU**, Editorial Board deina bangin MELC sunga local teng Patron member a pang ding chi ahiman in Local Church bang zat e khat in Patron Member fee Rs. 1500/- (Rupees One thousand and five hundred) only ape zouta hi. Hinanleh Local Church bangzat e khat te lemtang nailou ahiman un Patron Member fee ape thei nai sih hi. Ahi theileh tam anei a Local Church hing kitahlang te'n Patron member fee MELC Office ah hing pe ding in Pasion min in ikingen in ikitheisah sawnsawn uhi.

GOSPEL TANGKOU Rs. 1500/- Church a pe nailoute

- | | |
|------------------------|---|
| 1. Central Church MELC | 2. Ngulzenveng MELC |
| 3. Tuaitengphai MELC | 4. Sehken MELC |
| 5. Mata Mualtam MELC | 6. Kullian MELC |
| 7. Tuining MELC | 8. T. Vajang MELC |
| 9. Sugnu MELC | 10. Zoubethel MELC |
| 11. D. Jangnuom MELC | 12. Saite MELC |
| 13. N. Leitan MELC | 14. Leijangphai MELC |
| 15. Tonjang MELC | 16. Suongphu MELC |
| 17. Jangnuom MELC | 18. L. Zoujang MELC |
| 19. Shillong SL | 20. Singheu (Paid Rs. 120/- Due-Rs. 1380) |

*** Tam atung a kho min tuang louite apesa ahita uhi.

H. Khaikhogin, Circular Manager

ITNA
(Rom 15:8)

~ Rev. Thangliankham, Director of Missions

“Ki it tuona loungal koima bangma basih un, a mi hinpi it pan dan a zop bukimta hi.”

Itna ichi chiengin eiten Pasion i itna hilou in Pasion in eite ahing itna jal a atapa ahing pieh khietna itna ahi. (I John 4:10). Tua Pasion in eite ahing itna jal a ikhelna tan ding leh ngaidamna dinga atapa Kross a shi ding a ahing sawl a, eite khelna jieh a shi dingte huonga Kross a ahing shina, shitanpha thuoh a ahing shingamna itna ahi. Tuama banga ei Khristianten zong imi hinpите it dinga thupieh ihi.

Itna kipatna khu Jesu ahi, Ama Jesu jalin ahi eiten i it thei uh I unaute leh sang gamte i it tuom se na pen a mau zong Khrist toh ki matna lamdang ana nei jieh uh ahi. Khumi ahi I it ichi pen Khrist itna a kipan ahi ding ahi. (I Kor.16:24). Tuajiehin itna i chi chieng in, a juou leh alem maimai a it hilou in iki it tahtah ding uh ahi. (Rom.12:9). Ka it chimai a gen pen a lem maimai ahia, u leh nau chia ki kou kou zong angaina maimai ahi, kam sung a thu lel tah toh ki it lou in, thutah leh nasep

gamtat hoi toh iki it ding uh ahi. A gen a gen a thaw hilou in gamtat toh ahizawh ding ahi. (I Jn.3:18). Khum hitaleh a lungsim gilsung a pat a itna leh thutah a ki itna ahi ding hi. (I Pet.1:22).

Itna khu midangte ahoina ding uh deisahna ahiei, a hoina uh kipahpina a hiei, midangte ngainatna leh amaute toh ki khawlkhawm leh nop sahna mai ahi sih a, midang buoi huoipi leh kikhawl khawmpi ding a huot huoipi zong ahi kha thei, hinanleh khum bang mite ahoina ding uh deisah teiteina khu itna ki chi ahi. (Mat.5:43-47; Jn.3:14,16,17) en in.

I innvengte i it ding uh ahi (Lk.10:29-37). Tualeh i it ding a kilawm lou igalte/melmate na ngawn i it ding uh ahi. (Mat.5:44). Pasalten ijite uh i it ding uh ahi. (Eph. 5:25). Jiten zong apasalte uh a it ding uh ahi. (Tita 2:4).

Itna in ama a ding suilou in, a innvengte hoina ding a suizaw hi. (I Kor.10:24). Itna in ama

Gospel Tangkou September 2019

angsung ding mai a khuol sih a, midangte a ding a enzaw hi. (Ph.2:4). Midangte puohgih a dawn hi. (Gal.6:2). Hatloute a papi a, ama hoina ding leh kipahna ding mai a suii ih a, midangte hoina ding leh kipahna ding in a sem jaw hi. (Rom.15:1-3). Tai ah zong Jesu ma i ettou dig ahi.

Itna in mikhielte a hamuon a angaidam (II Kor.2:7,8). a, apuate chingkam tahi a phong dingh hi. (Gal.6:1). Gatat gilou a gamtangte a taihil a, a lungkete a hanthawn a, ahenem a, thuohzou tahin a hatloute apanpi ahi. (I Thes.5:14). A Unaute puona ding a sem nuom sih a (Rom.14:15,21). Kilemna a del a, midangte abawl hoi theina ding a sui (Rom.14:14). a lungke ngaisih a (Lk. 6:32) a chingh in a siem a, Pasion in Khrist tungtawn a ahing ngaidam bangin, midangte tahsap awng ahuh sah a (II Kor. 8:24; I J. 3:17) mi dangte angaina hi. (Rom.12:10)

Itna in atunga takhielte atai hil hi. amasa in a sim in atai hil a, khum baah theipi khat leh ni mai ah atai hil a, abanah hattuom mai ah ataihil hi.(Mat.18:15-17) Vatang tunga khielte khu vantang mai ah a taihil ahi.(I Tim.5:20).

Itnain midangate a thumsah ahi. Thumsahna sang a ki bawlsah thei tamzaw a umsih hi.(Mat.5:44). Unaute a ding a hinna pieh kan a silpieh liazaw a umsih hi.(I Kor.13:1-3). Itna khu ginna leh lam etna sangin a lienzaw hi.(I Kor.13:8).

Ki ittuona in Pasion thupieh tengteng a khaikhawm hi. Khristian ihina laigil pen zong itna ahia, “Khrist” Thupieh (Thuhuntha) a a dangteng zousie khu suoh zaupen zong itna ahi. (Jn.13:34; I Jn. 3:11,23). Khum khu kumpi dan zong ahi hi. (Jakob.2:8). Hoina zousie ki gawm khawmna zong itna ma ahi. (Kala 3:14).

Itna i khelna sim senglou a khu zou ahi. (IPet.4:8). Mi gilou a bawl hoi hi. (I Kor.8:1) Mi a gawmkhawm hi. (Kolo. 2:2). Unaute itna in thumna lawchinna a piengsah hi. (I Jn. 3:22, 23).

* Pasion itheileh, theilou, ahilou leh Pasion a pat a pieng ihi leh hilou, ahilou leh, Pasion tate ihileh ihilou kithei chetna khu Itna ah a kinga ahi. (I Jn. 3:10; 4:7,8). Shina apat hinna a ilut leh lutlou kithei telna zong itna ma ah a kinga hi. (I Jn.3:14). Pasion ah i um a, Pasion zong ei ma ah a um hi chi kithei telna zong iki ittuona ah a kinga hi.

(1 Jn.4:12,16). Tuabanah Pasion i it tahtah ahi chi ki theitelna zong ahipai hi. (1Jn. 4:20). Tualeh nna dang zousie sanga nei i utpen leh isui pe zong itna ma ahi. Paul, John, Peter leh Jesu'n itna a tungnungpen ahi dan kibang in a gen chiet uh ahi.

Itna i chi hagau 'Ga' ahi. (Gal. 6:22; Rom. 5:5). Eima tup leh sawm thu in itna a ki nei ngaisih hi. Bangjeh in e i chileh, itna pen ihing pienpi in a gakhe ngaisih hi. Itna khu a del in idel ding ua (1 Kor.14:1; 1 Timo. 6:11). Ki it ding in iki hanthawn chiet ding uh ahi. (Heb.10:24). Pasion in ki ittuo chiet ding in ahing jilsah ahi. (1 Thes.4:9) a, ithumnate ahig dawnga ki it semsem theina ahigpie hi. (Phi.1:9).

GINNA ICHIPEN ITNA NASEP AHI;
ITNA ZONG GINNA 'GA' AHI

(Gal.5:6). Itna pen ginna sang in a lien zaw a,m hinanleh ginna bulpi khu itna ahia, aga zong ahi. Ginna pang lou itna khu, itna pang lou ginna sang in ahoi zaw, i chi chieng in thei aga neilou a zung guoh nei sang in, thei kung mai nei ahoi zaw china bang leltah ahi; Zung neilou sing in ga suo theisia, ginna nei lou hinna in zong itna a suokhe theisih hi.

Tuaziehin itna leh itna dan i zil khiet theina ding in Jesu Khrist ma ilungtang ah teng sah in, Nangma leh nang ma ki itna leh na kikhuolna tawpsan inla tahsa (pienpi tahsa deina) tawpsan koi in, tuachiin na sung a um Khirst hingsah ding in kiphah inlen Ama(Khrist) na sungah tengsah in. (Gal.2:20).

MANGPAN A THU GUOLZAWL
TAHEN.

GHOUNA

(Challenge)

(Text: Nasepte 4:36)

Barnaba thu sutzomna:

~ Evan. D. Ginpu

A. Hamuanpa/Hanthonpa ahina.

1. Amin masa Joseph/Joses hi a sawltah ten ahina toh kituoh in khat amin phuosah ua,

BARNABAS (Hamuanna tapa, ana chi uh.

2) Tangthu khat um in ngaituota lei Nas. 4:37):

a) Penticost ni in Barnaba zong Jerusalem ah om kha a Hattuom kipan tung Juda mite pulam apat kiphutuo zai zai in gingtha kibelap uh hi. Mipi tamtahte hattuomte kung ah umden in hattuom a Sawltahte buoi thei mama uhi.

b) Neh leh dawn thu ah vaisaina hing tam mama in tuo hun ah Barnabas in Hamuonna kinepna chite hing semsuoh hi. A thu leh kam siem maimai in ki it sih vai in. Nasep leh silbawl toh chitahna toh ki it zaw vai. (I John. 3:18)

c) Hattuum hing kipan tungte ading in Malam sonna ding in Barnabas apha tuom hi.

d) Midang panpi ngaite a ding in Barnabas aphatuom hi. Nang hattuum leh mimal a ding a ding na pha tuom kha ei ?

e) Bartnabas in amin toh kituoh in Antiok ah Pasian nna vasem hi. (11:23) Antiok khomiten Pasian hepina atan uh amu un kipah mama ua phatuom ngaitah a Mangpa tu tinten ding in Barnabas in va hanthawn leh hamuon hi.

B. Ginna/Muanna (Nasep 9:26):

Barnabas Ginna a dim Mangpa ah ginna kiptah a nei bang in midang kungah zong ginna muonngamna nei mi ahi. (Nas.9:26-28)

a) Hattuumte melma lian penpen ahi thei Saul Damaska khuo a kipan Jerusalem a hing kia hi.

b) Gingtu hitananleh Jerusalem a hattuumte kunga kihel sawm nanleh Stephen kithana thu a thu petu ahidan mang hillou in zau den uh hi.

c) Tuabang hun a Saul zauhuoina dinmun a adin lai in zong Barnabas hangsan tah in dinpi ngam hi.

d) Tuabang hun zauhuoi laitah in zong Barnabas zieh in Saul/ Paul in Jerusalem ah Pasian nnasep hing pan theita hi.

e) (Nas. 13:13, 15; 15:36-40) Paul leh Barnabas Missionary a khuolzina na uh akhatveina ah John leh Mark vatel ua, Missionary na asepnah hasa sa a lungkie a nuakia kia ding un gintat huoi hi. Hun bangtan zou a diei, khat in aniveina Missionary nasem ding ahing kipat kia phat un. Marka zong om a kipan in aman zong kang jui ding hi a chi hi. Tuophet in Paul in nasatah in niel nanleh Barnabas in muong ngam in hepina ta pa ahi mabang in thei siemna lian tah toh muong ngam hi. Barnabas mikhat kei ana sepna ah lawsam nanleh ami veina ah lawching thei chin gingta hi.

i) Barnabas in mimei puo mama khat zong mihat leh hangsan tah a kituoh leh hangsan leh lawching thei chin gingta hi.

ii) Galkap sepai meipuo nanleh zong khatvei chieng hangsan thei, sepai muonhuoi pen suoh thei chi hi.

iii) Tam teng Bartnabas in Paul kung a agen chieng in Paul toh anasepna uah kikhen law uhi. (15:37-50)

iv) Hut khiet a um Marka khu Tanchin hoi Marka giel in hing pang doh hi. Paul ma in zong AD 66-67 lai in II Timo.4:11 a imu pansan in zong apatatna thu nagen hi.

C. Missionary nasep poimaw ngai hi:

a) Khamtanhoi thupha Judate maimai a ding hilou in mihing teng teng a ding ana chi hi.- Nas.11:22

b) Antiok ah hagau nasepna va en khie in kipahpi mama a hanthonna thu zong va gen hi.

c) Antiok khuote bu min bang zeizoi in va mu a Saul toh lawching mama khat va suoh hi.

d) Juda leh Zentel te kung a

Pasian thupha gen ding mi pil poimaw ahidan zong va mu hi.

f) Saul midih tah hi ding in ngaituo a Tasis khuo ah va sui khie hi.(Nsa 11:25)

g) Antiok khuo ah nuajui te Khristian akichi masapen hi (11:26)

h) Antiok khuo miten kolmong tan ah Pasian nasem ding sawlkhie uhi. (Nas.13:25) Tuajieh in unau Manggam na kaseppite aw Pasian gam na isepnauah lawchinna ding Belam-te poimaw ngai a, ei ma kitha nuom sah a ngai ahidan Barnabas apat imu thei hi. Van hagau siengthou in nang Khantan hoi thupha jal a kalsuon jel ding leh pei jel ding in ahing poimaw hi.

Mangpan a thu guoljawlta hen.

NOAH HUN LAI A TUILET IN KHOVEL PUMPI A TUP HI

(Gen.7:11-13)

Rev. Dr. Hangminthang, Director of Ministries, MELC.

Malai tangthu, a tahtah hilou khawp a kigen, Noah hun a tuileet (flood) thu khovel pumpi huopsuoh ahi, chi muchien ahi. Khovel a mihingte suhmangthaina diinga, Pasian in tui a leet sah ahi. Gamsa Mesopotamia gam bep a mu ahisih a, Aigupta mite laibute leh India gam a Hindute laibute(Sanskrit) ah zong Tuileet thu ana kigiel hi. Gam tuomtuomte in zong Tuileet tangthu ana nei chiet uhi.

Gospel Tangkou September 2019

Tam thusim zousie gen seng sih vai in, apoimaw dieh khat gen vai. Sumer gam a leikuong minthang tah kimu doh khu, Gilgamesh gam thupi hunlai sil ahi. Noah hunlai a luilet tangthu khu chituom nam tuomte in zong ana gen uhi. Sakhaw laibute akigente leh amu dohte ukhu :

Khatna : Tuileet tangthu a theipha tengin, Pasion gen-lawhna um masa theina a nei chiet uhi. Tuilet sah Pasion in nam teelte kungah kilaah in, tuiletna diing thu a hillawhna nei in phawh hilna a pie a, abitna diing ua kuong bawl diingin thu apie hi.

Nina ah : Mipite, Pasion thupieh zuite- numei leh pasal naupangte khu tuilet apat a suohta uhi. Tami bep hilou in, ganhingte kungah a lutpi ua, a suohta khawm uhi.

Thumna ah : Tui ahing kanbep in Taang saang tah khat tungah kuong akinga hi, achi uhi.

Lina ah : Tuilet ahing beibep in, tuilet abei tahtah naimah chin, va a hakhie uhi, achi uhi. Tualeh, Tuilet kia louna diingin Sakhi-Tuihup a um hi, a chi uhi.

Ngana ah: Tuilet lai a a suohta i gente uh akibang chiet

hi, China gam a umte'n Nuwa or Naa achi ua; Aztee gam a umte'n Nota a chi ua; Sagaries namte'n Noi achi ua; Haqai mite'n Nuu achi uhi. Tualeh eite'n Noah ichi uhi.

Tam banga thusim (History) amaute theidan ana chiemte thute uh akibang sim chiet hi. Tami in Noah Tuilet khu atahtah ahia, khovel pumpi tuum (covered the whole world) ahi, chi akichien mama hi.

Michigan gam mun khat ah India mite ateeng ua, suongpeh tungah lai kigiel tampi mudoh in a um hi. Suongpeh a lai kigielte khu thupi nga in a kikhen hi:

Khatna ah : Pasal upa tah lim, bohkhup a kun a um hi. Anina ah : Gua tapi zuh leh tuilah a mi tampi kelut lim a um hi.

A thumna ah: Azietlam leh veilam ah ni 40 leh zan 40 chiemtena a um a, vakhat a muh (pick) a singnah tawlai khat lim a um a, a lailung tah ah kuong lienpi khat tui tunga kilam lim a um hi.

Alina ah: Ganhing (animals) akop kop a kuong apat hing pawt doh lim leh mi li kipah tah a kikou, nisa nuoi a ding lim zong a um hi.

Gospel Tangkou September 2019

Angana ah: A lim ngana lailung tah ah sakhitlaihup lim a um kia hi. Bible a Tuilet thu kigen bang bang a lim akigiel suognpeh tung um akimu hi. Khum Suongpeh tunga sil lim kigiel zousie khu nisa(sun) in akhaw suh a, a lina khu a lum bang in a um hi. Tuilet masang in Leitung a tui um pen in nisa a liedeu ziehin, a lum bang in akilang hi. Tui ahing kiesuh nua in Nisa khu a lum in akilangta hi. Tuilet masanga Nisa khu sil muhzum deu bang a um agel uh, tualeh tuilet nua a Nisa kilat dan a gel uh hi diing ahi. Tam thusim(tangthu) khu a khang khang a peisawn ahi.

~~~oio~~~

## **HOMO SEXUALITY KICHI BANG E?**

*(Leitung Dan in phalna pe nanleh  
Khristian te thugin Bible in aphil lou.....)*

**By:** *Pastor M. Thangboi Zou*

Thumapui: Ei gingtute (Khristiantte) khu Leitung mite Tawndan a tawn ding maw, Laisiengthou gen bang a tawn dingte? chi theisiem lei ka nuom hi. Apeisa Kum 2015 laiin India Supreme Court in “Nei kibang Kitenna pen” damsung Thawng tanna leh Sum tampi lieusah (fine) ding ahi chin Thutanna (decision) ana bawl upen, India Thukhentu (Chief Justice of India) a sem Dipak Misra, Rohinton, Nariman, AM Khanwilkat, DY Chandrachud leh Indu Malhotra ten ningkum September 6th, 2018 ni’n Supreme Court of India in Inidan Panel Code (IPC) Section 377 in tam dan pen India Khuo-le-tui hina neiten zalen tah a zat ahitheina din phalna ahing bawlkhe tamai hi. Tami “Nei kibang kiten theina” mi tampi’n kipahpi in lawm hiel nan ulezong ei Gingtute die i Laisiengthou toh kikaal ahidan kikum khawm lei ka nuom mama hi.

Tunia khangthate adia kipat khietna ziehte” mawltah in buoina lienpen khat ahing hita i suut dinga, tua zou chiengin man in, tamnah “Homosexual Laisiengthou in phallou ahidan kichi bang ahiei? Gay Marriage toh ikhupsit ding hi. Tamna igen kichi bang genna e? Gay dingte ahileh laibu tuomtuom Marriage hing kipatdan leh hing leh internet tungtawn a

kaikhawm ahi man in, get chingla leh genval a um leh Pasian leh simtu zousie kungah na ngaidamna uh ka hing ngen masa hi.

1. Homosexuality kichi bang gen na adiei? Tamin agetnuom pen ahi leh, “mihing tahsa utna nei a, Nei kibangte ki-etlahna leh hip a um mite genna ahi” aki chi hi. Tami khu chini in akigen thei hi, tuote ahileh: (a) Homosexuality - Behaviuor kichi khu, “lungsim leh tahsa mama uh ana zong sangte, akhawl thei nonloute (nu-le-pa thangtatna a)” gennan akizang hi.

b) H o m o s e x u a l i t y - Orientation kichi khu, “Nei kibatpite etlahna leh lunggulna nanleh numei/ pasal umlouna a khat veivei tahsa utna pichina dinga kizangte akipan ahideu in” akigen hi. Tam banga khelna in vai ahing hawmna khat ahi leh tunia I Mobile zatte uh ahi, chin aki suut khie hi. Tam banga chindan hoilou a gamtatna ziehin Pasian in Sodom leh Gomorra khopi khu “Mei leh Kaat in ana gawt/ subei hi”, tuochi mabanga tam bang khelna lunggul a supi chingnuom a hinkhuo zangtute leh ana zong sangte kunga Pasian thangpaina leh gawtna mu diing ahi uhi, a ziehpen

Khelna ahi zieh in (2Pet. 2: 9-10).

2. Gay marriage kichi bang genna adiei?

Gay kichi khu “Kipah” china ahimai a, hinanleh akizoppi thuteng zilin nei kibang pasal leh pasal kitengte kigenna ahi hi. Khuleh Nei kibang numei leh numei kitengte khu Lesbianism akichi kie hi. Gay marriage ahing kichi chiengin, Dan banga “Nei kibangte kiten phalna” (legalization of the gay marriage) china lam akawh hi. Tam nei kibang kitenna pen tuhun ahing umkhie hilou in, Rome Kumpipa Nero in asuohte (slave) khat ana kitenpi in, tua hun akipat hing um ahita hi.

3. Gay marriage hing kipat khietna:

Tam bang chindan hoilou pen Gamsung Dan (Law) toh kituoh a Nei kibang kitenna phal hun ahileh apeisa kum 2001 in Netherland gam a hing kipan khie ahi chin akisuut khie hi. Khelna in tawp hun neilou ahiman in Meikuong bangin gamteng ban Kaat in, tuochin Europe gam ah um Belgium gam ah kum 2003 in ahing kaa touta hi. Tuo zouin, kum 2005 in Spain gam ahinglut toukie hi. Kum 2006 in Canada gam leh



South Africa gamten zong tam chindan kilawmloupi hinanleh gamsung a zuiding chin phalna ahing nei kie tamai uhi. Silhoi in masawn theilou bang zong leh sietna in masawn tou in tuachin 2009 kum in Norway leh Sweden ganten zong zuidin ahing phal kie tamai uhi. Leitung a teng mi koizong, apil amawl, ahau azawngten umna die agaldawt zing uh USA gamten zong ahingpom tamai uah, US gam sunga State 50 umte lah a 37ten aphalta ua, 13ten anuol nalai uhi. President Obama invang tam “Gay Marriage pen gam sunga zatdin phallou/ lemsapilou hi”. Mexico inzong phal pieh nanleh Mexico Khopi sungbou a zat din akiphah giep hi.

Koi khuo Kelham umtuon lou akichi mabangin, gamdangte ah igenlai un, itenna India gam sunga zong tami zatdia phutna tam um seng ata diei? Delhi High Court in zong alemsapi tamai hi. Singtang mite tuollenna Manipur (Sana Leibak) kichi azong ana kiphah hingei van, apeisa 25th March, 2010 in Leimayol Arts Centre Auditorium mun a Sabdeep Soibam (26 yrs) leh Nikhil Sharma (28 yrs) te mitampi mai

a Gay Marriage zat ahidan phuon khietna nei in akiteng ta uhi. Khuleh kum 2005 kum in Chapi Karong a Sangsye nna kavasep lai in, ka mit ngel in Numei leh numei kiteng kava mu hi.

#### **4. Gay Marriage hing kipat khietna ziehte:**

Mipil leh siemte suut danin, tam Gay Marriage hingki patkhietna khat ahileh, pasal amau ngen umna a numei a kilawp mama uh akichi a, numei zong amau ngen umna a pasal ah akilawp mama uhi, akichi lai in mi khenkhatten, mani Nei kibatpite etlahna leh ngaina nei thei uhi. Tuate ahileh Sepaite, Thawnga (jail) sawtpi umte, Rebh. Centre a hun sawtpi umte, Hostel tuomtuom aumte leh amau chou mun khat a kikhumte'n tambang lunggulna neibei uh chin asuut khie uhi. Dr. Collins in agen dan in, “Mihing hi ngala, nei kibatpi ahiei, ganta bang ngaina, lunggul leh kithuopi/ pawlpi ahi” tami khu Homosexual ahie, tuona kipan in Gay Marriage ahinglut tou uhi, chin agen hi. Khuleh Lawrence J. Hatterer in “Changing homosexual in the male” chi laibu agelna sungah hichin ana gen hi. “Nute'n numei muonlouna leh zauhuoina a tapate uh a sinsah uh ahiei, a

tanute uh pasal muonlouna leh zauhuoina azilsah chiengun naupang lungsim ah mani kibatpite lunggulna nei in um uhi. Nu-le-paten Sex thu zilsah himhim lou, mawhsana diing bou a gel leh Tate'n amau a sil umte theisiemlou in Nei kibatpite toh genkhawm in, kithuoh khawm un, tuo thanga mi tampi alut kha uhi" chin ana giel hi.

**5. Hattuumte panla dan:**

Hattuum ichipen Jesu'n Kalvary Muol Sing Kross a a sisan toh aphukhiet ahi man in, leitung tawndan a tawn thei dingte ki hilou in, Lasiengthou deidan a tawn dingte ihidan uh Hattuum chin a tami Homosexual ahoilou dan i tangkoupi ding uhi ahi hi. Tuata ahileh:-

**i) Roman Catholic Hattuumte panla dan:**

Homosexual toh kisai Fr. Stephen Fernandes, Secretary, Justice, peace and Development, Indian Bishops Conference ah tam bangin ana gen hi, "Amasapen in Nei kibang kitenna leh kithuona, mi piching hiin pichinglou hitaleh khelna leh Dan kal ahi chi ka hing gentha kia hi. Catholic hattuum in mi piching kithutuo hinanleh uh Pasion in nupa kal

a kithuona a bawl, itna a kigawmna tungtawn a ta leh nau nei ding a chi numei leh pasal kitenna toh kisai kikaal ahiman in kipawm theilou ahi" chin agen hi. Tualeh Micheal Jerrell in Catholic Hattuumte kungah thupie khautah khat abawl hi, tua khu ahileh, "Catholic mi-lesa himhim tambang nei kibangte kitenna vatel/ panglou din hanthawn hi." Supreme Court thukhenna in Catholic hattuumte peipi kitenna kaal ahi man in, a kinang/ dou hi, achi hi.

**ii) Southern Baptist Conventione panla dan:**

USA Supreme Court in nei kibang kiten theina phalna abawl lai in, Russell Moore, President of the Ethics & Liberty Commission, Southern Baptist Convention in tam bang in agen hi, "Amasapen in Hattuumte patau sih un. Supreme Court in septhei tampi nei nanleh Jesu Khrist han apat hankhe theilou ahi. Ama ahing a, leitung pumpi a gam ahi" chin agen hi. Tami Dan (Law) in mimal leh innkuon tampi lungtang nasuna ahi tna chi zong ka thei hi, achi hi. Tualeh agenbe na ah, "Eima a um ginna det leh migitna, dihna hepina ah i dinkip ding uhi. Jesu Khrist hing zilsahte i gen ding

a, Ama sepban isem ding uhi. Hingdoute tungah itna leh lainatna nei in, Hagau leh Khantanhohi nei in kipah tahin Zion i manoh ding uhi. Pasion leenggam zong sui vai. Khantanhohi ah ding kip vai. Pasion bou izau ding ua, khovel izau sih ding hi” chin agen hi.

**iii) MELC ten bangchi panla ding?**

Supreme Court of India in Date 6th September, 2018 ni in IPC Section 377 tungtawn in Nei kibang kitenna hing phalpia nanlezong, ei Mangpa Jesu sisan a leisa a hattuumten tami khu Laisiengthou Siemchilbu akipat Kihilna tan adihlou umlou chia gingta a pawm ten IPC Section 377 kipawm thei lou ding ahi. Azihephen Pasion phukhietlou kitenna himhim khelna leh Pasion dan bohrietna ahi manin (Siem. 1:27, 2:24), tam anuoi a bang in itangkoupi ding uh ahi hi. Tuote ahileh:-

i) Homosexual toh kisai Khanglaite lah ah Seminar paper a la a tangkoupi ding ahi.

ii) Division chin a tami thu toh kisai Lamkaite hatkhawm a ahoilou dan leh i Hattuum in pawmlou dan hoita hilchetpi a, tami kitenna a ibuoilou na ding ua panla pi ding ahi.

iii) Pastorte leh Hattuum Upa ten tami toh kisai Sermon bang in kipe thei leh i mite adin damna hiding hi. Tami thu zumpi lou a, ei kunga um nai sih chi a genlou a koi vawt lou ding ahi hi.

iv) India Superem Court in phalnan leh ei MELC sunga tam bang chindan hoilou neite Hattuum in Ki-en maimai lou ding in, tua vaiguon a Pasion thaunu Pastor, Upate leh Hattuumte panglou ding, a pang aumleh MELC Dan kaal ahi chia koima maipha enlou a Nosuo ngam dia mansa ihi dan hangsan tah a talat ngai ding ahi.

**6. Laisiengthou leh Sawl-tah Paul in Homosexual agen dan:**

Tuni chiengin, leitung kivaihawmna’n tami Dan phalna pezong leh, ei gingtute a dinga kingapna ahiloudan, i thuginpi uh Bible in, tambang agamtate khu Pasion mitmu a kidah huoi leh gawt aum diingte ahidan, ana gente i en diing uhi. Tuote ahileh:-

i) Gay Marriage khu bangchituhin kigen hoi nanleh Pasion silguon kalna leh Bible zilsahna toh kikaal ahimanin hattuumten pawmthei hilou hi (Gen. 1: 26-30).

ii) Pasion silguon banglou tah a Kitenna/ Nupa hinkhuo (sex)

zatpen azada mama a, tuochin Leitung a teng Mihingte Tuichim/Tuisang in Noah hunlai in mite ana gawt na khu Pasain zada mama khat “Pasian Tapaten mihing tanu melhoite am ua, adeite uh zi dingin akitenpi uhi” (Gen. 6:2) khu ahi hi. Tunia Nupa hinkhuo (Sex) zat hunlou a zangte tunga tambang Pasian thangpaina tung thei ahidan theisiem in, zangdih chiet din iki ghen hi.

iii) Pasain in Sodom leh Gomorra Khopi bangding a Mei leh Kaat ah agawt adiei? i chileh a ziehpen “Thanghuoitah a Nule-pa hinkhuo (sex) a pasal-le-pasal, numei-le-numei kipawlna zieh ahi” (Gen. 19: 4-5, Jude 7).

iv) Lungsiet Johan in Patmos Tuikuol a Mangpa akipan Mangmuhna (Vision) amu lain, hichin Rev. 21: 8 na sunga, “...Meipuohte, gingtaloute, numei leh pasal kaal a thangtatte tanding khu Mei leh Kaat Meidil ahia, tuokhu shi nina ahi hi” chin ana gen hi.

Sawltah Paul in Homosexual agetdan:

Paul hun in Asia Minor leh Europe mun tampi ah numei-pasal kal a khelna a uang mama hi. Adie in Korinth Khuo, Rome Khuo, Kolosa khuo leh kho tuomtuom ah Homosexuality

(Tokawhute) toh kisai agen dante tam anuoi a bangin muthei in aum hi. Tuate ahileh:-

a) Paul in Korinth hattuumte kungah Homosexual kitenna leh kipawlna phalna bangma apesih hi, “Sol in um sih un... kingaina thanguoi abualte, pasal kizuohte, tokohuaten Pasian gam luolou ding uhi” (1Kor. 6: 9-11) chin ana gen hi. Tokawhu kingaitenna achienzaw semna dingin Paul in Grik kammal azat, khenkhatte anuoi a ensuh nalai vai.

Kingaihatte ( pornos) chia azat kammal “Pronography” kila khietna ahi. Tami khu numei-pasal guotang lim, numei-pasal kipawlna (sex) video etna leh zongsanna genna ahi. Milim bieh ahilou leh angkawmte genna in (moichos) chi kammal a zanga, tua khu “sum leh pai deina leh numei lunggulna” genna ahi. Mihuate (malakos) azang kia a, tua khu, “nem, sukhah a nem” china ahi. Tamin numei-pasal toh kipawlna a numei dinmun agenna ahi. Tokawhute (arsenoskoites) chi azang kia a “arsen” in aget nuom pen khu “pasal” ahia, “koites” in “lupna” agenna ahi. Tamin agetnuom pen ahileh, “pasal in

pasal luppi” china ahi. Nei kibang kipawl na (sex) a pasal dinmun (male role) genna ahi. Numei leh numei kipawl na a pasal dan a pang genna zong ahi. Ganhing toh kipawl khu sil zauhuoi ahidan leh tha teitei ding ahidan (Pawt. 20:19) nana gen chieng mama hi.

b) Paul in Rome mite kunga Laithot anathot lai in, hichin ana gen hi, “Tuabangin pasalten zong numeite zahdan ngaina tawpsanin, huain aki enla ua, pasal-le- pasal zumhuoi tahin akizang tuo ua.....” (Rome 1: 27) chin anagen hi.

Tami Rome bung 1 na sunga Paul kammal zatte apat in Rome hattuomte siltuo, “A tahsa uh zumhuoipi a kipawltuona ding in lungtang in anei uh” achi hi. Tamna Grik kammal “Epithumia” a kizat zieh in, tamin agetnuom pen ahileh, “ngeinalou tahsa utna, nopsahna lunggul” china ahi. Tamna ngeinalou tahsa utna thoina “Homosexual” (tokawhute) khelna genna leh “lebianism” khelna hi in laisiengthou siemten asuut khie uhi. Homosexual khelna Pasion in mimal leh gam a gawtna khelna achi hi.

**Akhupsitna:** Homosexuality khu Pasion leh Laisiengthou

deidan a gamtatna ahilou zieh in, tam bang agamta mite akhelna man khu ama bou in a gaa a at-sih diing a, a innsung miten zong, kho sung miten zong, Pasion thangpaina gawtna itan thei uh ahiman in tami thu ah pil vangta a hin apoimaw mama hi. Tunin eiten tami Homosexual thu a Seminar bawl pen zumhuoi nan i gel ua, i bawl ngailou zieh uh ata diei ma, tunin igam sunga tambang thangtatnan mun ningkawm chinteng adengsuoh a, itawpsan lou uleh Pasion thangpaina pen imaban diing ahiman in, mailam hun a Hattuom leh Organization a lamkaiten Seminar ibawl chiengun Paper khatin pangsa talei chin ikingen hi, a hoiloudan ikihil lou vang un, tunin tuomi theina diing in laibu tampi simthei din umta, thamlou in mit a muthei din Mobile tungtawn in umsiengta ahiman in, India Kumpi’n phalna pe zong leh ei gingtute thugin toh kikaal ahidan nasatah a itangkoupi lou uleh dachie I khanglaite tami thang ah hing aw va un, tua hun chienga a buoi dingte khu ei hattuom lamkaite ma ihi man un, tunia kipan tangkou kipan tavai, chin Pasion min toh ka hing ngen leh chiel hi.

~~~oio~~~

JESU SUI MI NAM THUMTE

Pastors Nengkhanmang

Jesu a kihei a ahingjui uh amu tah in a kung uah bang ahiei? nasui uh? achi hi. Amauten Rabbi hei a um na hiei? Achi uhi. Aman hingpei unlen hing en un a chi hi. (Jn.1:38).

Leitungah mihingte a dingin, sui ding leh del ding atam a, hinanleh ei haw Christiante a dingin isuipen uleh idel pen ukhu Nazareth Jesu ahi. Aman tangton hinna a nei chi ithei uhi. Tuazieh in Jesu isui un idel uhi.

NUAJUNITEN JESU A SUI:

A zingkia in Baptispa John nuajui nitoh a ding khawm a, Jesu vah lai a mu hi. En un Pasion Belam nou chin akawh a nuajui niten amu ua Jesu kungah a peita uhi. Jesu a kihei a, ahingjui uh amu tah in bang a hiei? na sui uh a chi hi.(John.1:38). Jesun ama sui a ama mu nuom a a kungga hingpei ahi uh chi a thei lou ahisih a, hinanleh amau hing dawwna khu bang ahiei? chi Jesun a ngainuom zieh in, mizou sie in a sui uh bange khat taina ding khopmu sawm a suite bangin ahoup i a, koi ahiei na sui uh? chi lou in bang ahiei nasui uh? achi hi!. Amaute ni in zong Jesu dohna dawng lou in Amani lunggel na a um pen in a dawng ua, Rabbi hei a um na hiei? achi uhi. Tu in Jesun a tuppen leh a deipen angata a, hingpei unlen hing en un a chi hi. Tuakhu van apatt a lei a ahing kumlaw na thu guh gil tah khu theisah in ahilta hi. A thu hil khu

kidang seng asa ua, ngaih a sa ua, angai nuom ua, a lung lut ua, a gingta ua, apom kip ua, Jesu toh a ki chimatta uhi.(John.1:39). Koi zong Jesu kunga pei a, khut guoh keu a ki lekia a um sih hi. Khum nuajui nite lah a khat pamin Simon Peter sang gampa Andru ahi. Khat pa min a gen sih a, John hiva a chi uhi. A ni un sitan a gin um in Jesu ajui denta uhi.

MIPITEN JESU ASUL:

Tualeh,(John. 6:24-27) sung isim leh mipitten Jesu a sui ua, hinanleh tuamun ah Jesu leh a nua juite a um nawnsih uh chi a thei tah un kuongneute a tuongin Jesu suiding in Kaper Naum lam ahing tungta uhi. Amauten Tuipi gal lam a Jesu amutah un kidang asa ua, Rabbi bang chih a tam mun natung nahiei? achi uhi. Jesun amaute dohna kamteng pen dawng lou in a genlou uh alungsung ua um pen jawh khu a dawnga, silmahte namu zieh ua hing sui nahi sih ua, tanghou naneh vah zieh ua hing sui nahi uhi. An mangthang sui in dieng dieng sih unlen, Mihing tapan ahingpieh ding Tangton hina sui in dieng jaw un(John. 6:27). Achi hi. Jesun mihingte kunga apieh ut pen Tangton hina ahi. Akilah ua

Gospel Tangkou September 2019

Tangton a ahin theina ding ua Tanghou toh a pieh tha ahi. Tanghou pen zing leh jaan a aneh uh hina, hinanleh tangton a hina pen khu Jesun a deisah jawh ahi. Jesu deisahna sang a amau dei napen zawh khu apibawl zieh ua Jesun aphoh hil ahi. Tanghou it asih a, Amaute hinna zawh khu a it ahi.

MIPITEN JESU LENGPA DINGA MAT SAWM IN ASUL.

Khum in Mipiten Jesu Lengpa ding a paumat sawm in hingpei mama ding uh hita chi Jesun athei a, A matangin Muol lam ah thum dingin apeita hi. (Jn.6:15). Mitampiten Jesu asil bawl thei dante amu ua, tuipi te leh huipite in a thu aman ua, tuinuo a um ngate in zong a thu thu ajui theidan a mu chiengun kidang asa ua, tam mipa khu Lengpa dingin kibawl leh Rome solkal nuoi apat in zong hingsuo tatpi zou va, achi ua, alunggul ua, Lengpa ding in a enla uhi. Tuachin Lengpa dinga paumat sawm in mipite hingpei mama ding uh hita chi Jesun a thei a, taanglamah apei tahi.

Tualeh, nitah lam ahinghi in nuajuite khu kuong neutu tunga tuong in Kaperna um lam juon in a kitawlta uhi. Tuipi tung taithum, tailii vai ding aki tawl nua un, thakhat pi in huipi ahing hat a, khuolah amiel a, tuikihot te sangpi pi in aki jawh touta hi. Achi maw ua, Jesu lah a tung naisih a, tuipi dum kiah kuah tungah kuongneu khat athe leng le le tahi. Tuipi um dan leh tuipi dung leh vai, tuitaw

tuilu um zie a thei nawnsih uhi. Van lah a miel a, Kapernaum kai mun hei sunga thei nawn sih uhi. Jesu angai mama uhi.

Jesu lah atung naisih a, alung tang uh van akhai bangin akham mama a, a mangbang uhi. Khum bang gimthuoh leh lungdongte a ding Lengpa leh Hundampa koi jawh apoimaw ding uai? Amau dingin Lengpa sangin Hundampa apoimaw uh chi khu Jesun etsahna (Practical show) ahing bawl a nasepleh silbawl in limlah na ahing ensah ahi.

Khum hunlai in Jew mite in khelnasal tang ahina uh sang in Rome solkal nuoi a atanna uh a pona jaw ua, khelna potsan sangin Rome thuneina potsan dingkhu a poimaw ngai uhi. Jesu'n lah Leitung Lenggam sang in Van a Lenggam a deisah jaw a, hinanleh amauten hundampa sang in Lengpa dingin a dei jaw ua aki sangkhiel ta uhi. Poi nalawm lawm e maw ! Khawh talawm ahi. Tam thu kigen khu koi tung thu kigena na ngai ahiei? Amaute tung tthu kigen ahi chi nawnsin, nangma tung thu kigen gen ahi.

Khum in khovah kuon in, Jesu kuonglam juon in keng ahing pei amu ua, thakhatpi'n a zau ua, nahpi tah in a kikouta uhi. Jesu khu abang chi mu uh ata diei? Jesu mulou in, amau lunggel khat amu zieh ua zau uhi. Hinanleh Jesun keima kahi zau sih un a hingchi tahin thakhat in a khang lou ua, a kipahta uhi. Bang ata diei? Jesu amu taahzieh uh ahi.

Gospel Tangkou September 2019

Jesu khu a um zingsa hilou amah? A zau lai ua zong um ahi. Ahileh tuabang chidan a zau nawnlou? A zaupa(Jesu zaupa) um nawnlou Lengmangta!...Jesu zau pa koi? Singga nepa ahi !. Eden Huon a Singga aneh ni un Pasien ama lam juon in ahingpei a, a en ngam sih uhi. Amau lungggel suolpi a mu zieh un a zau ua singlah ah a kibutta uhi.(Gen.3:8). Khum laitah limha a mu uh ahi. Tuakhu Mark leh Mathai in siha achipieh uhi. Mak.6:49, Mt.14:26). En in-siha achisih a Jesu'n keima kahi a chi tah in(Jn.6:20) a sung ua siha(Singga nepa) a llengmangg a Jesu amuta uhi. Na sung a singgag nepa a up zieh a Jesu mu thei lou nahi.

Khum in tuipi zau huoi na leh sina pel a suohta ana hita uhi. adam ana hita ua, Jesu kuong ah atuong sah ua, lung nuom tah in nui in a umta uhi. Jesu uplouna tapou sihate upna ahi. Na sung a Jesu a up sih leh siha a um ding a siha mit toh Jesu na mu sih ding hi. Nuajuiten Jesu kuongah a tuong sah ua, a sung ua Jesu a uptah zieh in hamuongtah in a kipahta uhi. Tui kihot leh

huipite a sipta hi. Tua leh a zot mun uh tung ana hita uhi.

Leitung mihing zousie, tami vannei siet tuipi tung a kuong neu khat chiet a kitawl lele ihi uhi. Na kuong khu a sie Tuike ahi. TTB ake e ? Canser a ke e? Hepatis a ke e? Heartach a ke e?Kal natna a ke e? Nahi bang chih chieng a tum ding na theisih, na thei lou zieh in ngaidam nahi sih. Na tum thou ding hi. Galili tuipi tung a miel nuoi a kuong neutunga, si ding zau a lungkhamte lah ah khat nahi. Nang dingin khovel hoina leh tanghou tamtah leh Lengpa sangin Hundampa napoi maw jaw hi lou maw ???

Ngaivoi ttu in amaute a um nawnsih, nang naumhi. Gel in bang chin na bawl diei ? Mi zousien a sui uh khovel hoina bang amakhat lungtai na ding khop mu sawm a, vannei gou leh tanghou tampi toh tuipi sungah tum lechin, nanglam juon a hingpei na hundampan bang a bawlta diei ? Hundampa khu nanglam juon in keng in ahingpei hi. En hoi lechin siha hilou Jesu ahi.

~~~oio~~~

---

## *Report tuamtuom*

### **WORKSHOP ON CONFRONTING POVERTY AND ECONOMIC INJUSTICE**

**Organised by :** Manipur Evangelical Lutheran Church

Manipur Evangelical Lutheran Church leh UELCI/Lutheran World Federation vaisaina nuai a Confronting Poverty & Economic Injustice Workshop date 19-21st August, 2019 sung MELC HQ. Church, Zomi Colony ah nei ahi.



## *Gospel Tangkou September 2019*

Rt. Rev. Dr. S.K. Manlun, Bishop MELC in Vaiguon honna leh mipi hing pei khawmte vaidawwna nei hi. Tualeh, Upa Nengkhenthang, Moderator MELC, Rt. Rev. Dr. S.K Manlun, Bishop leh Rev. Logan, Project Officer, UELCI ten Lamb Lighting bawl in thumn toh Vaiguon pat ahi.

Tam vaiguon ah Pastors, Upa, Women Leaders leh Youth Leaders mi 35 agom in pang uhi. Tambang vaiguon MELC huang sung a dinga akhat veina ahi. Tualeh, tambang vaiguon i nei thei na zieh ~ UELCI te deisahna liulieu zieh ahi. Tam vaiguon sung in Rev. Logan, Project Officer, UELCI, Upa S. Zamkhanpau, Meghshala Trust, ... Implementing Associate leh Rev. Lalrosiem Songate, Principal ECT te Resource persons in pang uhi.

Tam Workshop hun sung in participant te'n gamsung hasat dan leh MELC huangsung a zawwna (poverty) te apat pan la ding dan chi tuomtuom te zilkhietna nei uhi. Tam vaiguon in ngaituonate kihong sah mama in, khantouna ang tut ding i lam et uhi.

### **2019 MELC PASTORS' RETREAT REPORT**

September 2-4, 2019 sungin MELC Pastors' Retreat Camp, Dishop House, DSSS, Mantripukhri, Imphal ah vakinei hi. Tam vaiguon ah Pastor 21 kipeikhawm hi. Tam vaiguon a thuhiltu in Rev. Dr. J.M Paupu, Senior Consultant, Development Associate International pang hi.

Tami hun sungin Thuhiltu tungtawn in Pasian in i Pastorte uh Hagau lam ann tha in hing vaahsah hi. tambang vaiguon manphatah leh thupitah a izah theina ding ua, amun a pan hingna lahpi Peniel Church, Imphal MELC lamkaite tungah lungdamthu itut hi. Tam Retreat Camp apat hagau lam guolzawlina Pastorte'n a tante uh a manphat dan kam a gendoh thei leh genchien thei mawh ahisih hi.

Pasian in hing panpi henlen, MELC Hattuum Upate a din zong kinei theileh ut ahuoi mama hi. Khumi diingin zong thum chiet vai.



## *Gospel Tangkou September 2019*

### **2019 SUNGA HATTUOM UPA DINGA TEELTHA A UMTE TRAINING REPORT**

MELC Khawmpi 64 veina in Upa ngente teel thei dia phalna ana pieh uh kho 7 ahia, kho 6 apat teelching a umte anuoi a bang ahi.

1. Central Church : 1) Khamchinmang 2) T. Haupu Zou
2. Bethel Chapel : 1) T. Goukhomang
3. Peniel Church : 1) S. Lamkhokam 2) Chinsuanlam
4. Sangaikot : 1) M. Ginmuanthang
5. Suangphu : 1) Kamlianthang 2) Khamchinpau
6. Hqtrs. Church : 1) M. Ginkhankhup

Training: August 27-30, 2019 sungin Training neisah ahi uhi. Tam Training ah Hiltu (Instructors) in - Rt. Rev. Dr. S.K. Manlun, Bishop, Rev. Dr. Hangminthang, Director of Ministries; Rev. Thangliankham, Director of Missions leh Rev. Nengkhanlal ahi uhi.

#### **Subject :-**

- 1) Hattuum Upate nasep leh mawpuohna
- 2) Hattuum leh simlei vai
- 3) Local Hattuum sunga Upa nasepna
- 4) Christian Thuginte, chite ahia, Pasian zal in thawveng tah leh lawchingtah a zaw ahi ta hi.

---

#### **THUMPI DING**

1. 30th Sept. - 12th Oct. 2019 sung teng Bishop MELC Strasburgs France ah Seminar mang a kuon ding ahia, damtah leh lawchingtah a ang tun kiana ding in thumpi vai
2. 13th-18th Oct. 2019 sung teng Nh. T. Nuamboi, Upa Zamkhanpau leh Bishop te Martyn Institute, Hyderabad ah ELCA Grand Maker Training a kuon ding ahia, lawching tah a ava kalsuan theina ding un thumpi vai.
3. 20th-24th Oct. 2019 sung teng NMSI te 39th General Conference, Chennai a um ding ahia, tam vaiguon ah Bishop vatel ding ahiman in thumpi vai.
4. MELC HQ. Church, Zomi Colony ten Pate Camp Nehemiah Prayer Mount, Mualvaiphei ah 23rd - 27th October sung teng Hundamna Camp nei ding ahi ua, tam hun ah Rev. Ginmalsawm thugenpi a pang ding ahi. Pate Camp lawchingtah a jah ahi theina ding in thumpi vai.

## Patron Memberte

- |                               |                               |                                 |
|-------------------------------|-------------------------------|---------------------------------|
| 1. (L) Upa T. Chinzakhai      | 56. (L) Upa Pumzagin          | 111. Pu T. Samuel Tualminthang  |
| 2. Pi Warlita Manlun          | 57. (L) Rev. Khaamthang       | 112. Sya. T. Dongzalam          |
| 3. Pu M. Khamzamang           | 58. Pu T. Lamzagin ASC (Retd) | 113. Upa Paukhosuan             |
| 4. (L) Upa T. Gougin          | 59. Upa S. Kammang            | 114. Rev. Ginsuanthang          |
| 5. Upa M. Kaichinkham         | 60. Pu L/Nk Mangchinthang     | 115. Upa M. Khupkhanhau(Retd)   |
| 6. Pastor P. Vungzathang      | 61. Pu Pumkhanmang            | 116. Pu M. Haukholian           |
| 7. Pu P. Chinzakhup           | 62. Upa Tunzagin              | 117. Rev. Chinlunmang           |
| 8. Pi Chinnu (Mrs.Gouzadou)   | 63. Pi Zengaihniang           | 118. Pu H. Khaikhogin           |
| 9. Upa D. Khupsuanpau         | 64. Pu Chinsuanlam            | 119. Pu T. Chinkhohau           |
| 10. (L) Pu Thangkhanlal       | 65. Nu Kangnu                 | 120. Pastor Khupdokhen          |
| 11. Upa M. Jangkhhohau        | 66. Pu Genkapthang            | 121. Pu Khamkhanhau             |
| 12. Pu T. Gouzalal            | 67. Pu Paul Henkholal         | 122. Pi Lunsuanchiin            |
| 13. Upa Jangkhhogin           | 68. Upa Nengkhenthang         | 123. Pu Tutzamung               |
| 14. (L) Upa M. Khamzathong    | 69. (L) Rev. P.K. Khama       | 124. Pu Dongzakam               |
| 15. Pu H. Thangmang           | 70. (L) Pi Nuamneikim         | 125. Upa Thangchinthang         |
| 16. Pu M. Ginzasuan           | 71. Pu Dr. David Vumlallian   | 126. Sya Thangkhanpiang         |
| 17. Pu M. Kailam              | 72. Upa Ginzalam              | 127. Pi Goikhanman              |
| 18. (L) Pu T. Soiminthang     | 73. Rev.Kamminthang Tungnung  | 128. Upa Zamkhosuan             |
| 19. Pu S. Suankhothong        | 74. Rev. Thangliankham        | 129. Pu Jamchinpau Samte        |
| 20. Pu S. Tunsuanhang         | 75. Rev. Nangkhanlal          | 130. Sya Tunzalang              |
| 21. (L) Pu Hauchinmang        | 76. Sya Dongzapum             | 131. Evan. D. Ginpu             |
| 22. (L) Dr. Upa Tongkhokai    | 77. Dr. N.D. Samte            | 132. Pastor Khamkhenthang       |
| 23. Pu T. Ginzamang           | 78. Pu Sienzathang            | 133. Upa Chinsuanpau            |
| 24. Pu T. Goupau              | 79. Pu Sheshei                | 134. Pu P. Tunzamang            |
| 25. (L) Dr. Lampu             | 80. Rev. S.K. Manlun          | 135. Pu Kamneithang             |
| 26. Pu P. Sanjeev             | 81. Pu Hauliankap             | 136. Mother Neumzavung          |
| 27. Upa P. Kamzadou           | 82. Pastornu Niangzadim       | 137. Upa Thongzalam             |
| 28. Dr. Ginniing              | 83. Rev. Ngilzakhup           | 138. Pu Kaikhankap              |
| 29. Upa Lt. Col.Thongzadou    | 84. Pu Hausuanthang           | 139. Ex-Sub. Upa Kaichinpau     |
| 30. Pu John Zamkhomang        | 85. Upa Khamchinlam           | 140. Pu Ex-Hav. Thangzakhup     |
| 31. Pu M. Lunkhoneh           | 86. (L) Khaiminlian (13 yrs)  | 141. Upa S. Suanzakham          |
| 32. Pu Kapzamang              | 87. Upa H. Khamzamang         | 142. P. Chinminthang            |
| 33. (L) Pu Hauchinthang       | 88. Pu P. Sienzadong          | 143. Rev. S. Nengkhanmang       |
| 34. (L) Upa S. Khamzalam      | 89. Pi Neikhokim              | 144. Pu T. Lianchinlam          |
| 35. (L) Upa Sub. Lianchinmang | 90. Pu Hausuanlam             | 145. David Kapsuanmung Zo       |
| 36. Upa S. Zamzalam           | 91. Pu Ginminthang (Gigin)    | 146. Nh. Vunghauniang           |
| 37. Pu Khamzaton              | 92. Pu Khupminthang           | 147. Tv. Goumuankhup            |
| 38. Pi Nemrang                | 93. Nu Lhainei                | 148. Khupno Tombing             |
| 39. Upa Tuahchinhou           | 94. Rev. Kamminthang          | 149. Ginshanglian Samte         |
| 40. (L) Upa Kaikhohau         | 95. Pi Ngailianmoi (Momoi)    | 150. Ex.Hav. Khupzathang        |
| 41. Dr. Jainson Haokip        | 96. Pu Aron T. Muanthang      | 151. Nu Muanchig Sangma         |
| 42. Pu Kapkhanthang           | 97. Pu Thongneipau            | 152. Sub. P. Goukhanlian Zou    |
| 43. Pi Manpi                  | 98. Pu Dalkhanthang           | 153. Ex-Hav. Sianzakhai Munluo  |
| 44. Pu Philip Thanglienmang   | 99. Upapu Soikhohau Samte     | 154. (L) Upa Thangkhekam        |
| 45. Upa Haukholam             | 100. Rev. Thangkhanmang       | 155. Upa Thangkhojam            |
| 46. Upa Kaikhanlun            | 101. Rev. Nengkhanlal         | 156. Pastor Kapkhanhau          |
| 47. Pi Lhingneiting (Helhing) | 102. Pastor Lamgen            | 157. Pastor Thangkhangomam      |
| 48. Pu Thangchinsuan          | 103. Pi Cicilia Maman         | 158. Pa M. Ginkhankhup          |
| 49. Pi Goukhonin              | 104. (L) Pastor Kamzathang    | 159. Upa T. Pumminlal           |
| 50. (L) Pu T. Gouchinthang    | 105. Upa T. Nungkhochinpu     | 160. Pa M. Khammuanlian Zou     |
| 51. Pu M.L. Thanghau Zou      | 106. Rev. Dousuanthang        | 161. Nh. Momawi Milun           |
| 52. Rev. V. Hangminthang      | 107. Rev. Hangpi Manlun       | 162. Upa M. Hauminthang         |
| 53. Rev. Dr. Ginkhanmung Zou  | 108. Tv. Hauthang             | 163. Pastor Kamsuanlal          |
| 54. (L) Ex.Nk. T.Dongminthang | 109. Rev. Thangchinkhup       | 164. Ex.Sub.Upa T. Mangkhenmung |
| 55. Pi Neingaihaw             | 110. Rev. Kapsuankhup         | 165. Pu T. Ginkhothong          |
|                               |                               | 166. Upa V. Lawmsang            |

Koipou Patron member a pang utte a dingin ₹. 1500/- pie in a pang thei gige hi.

**If undelivered, please return to**

The Editor, Gospel Tangkou  
MELC Office, Hqtr. Zomi Colony  
Post Box – 10, Churachandpur - 795 128  
Manipur, India,  
e-mail : [melchqtrs@gmail.com](mailto:melchqtrs@gmail.com)

Gospel Tangkou (Gospel Herald)  
RNI Regd. No : 62170/95 MNP 76  
(Hachin a kisuo,hattuom khanletna ding)

(RNI Regd. No:62170/95 MNP 76)  
BOOK POST

To

.....

.....

.....

*Layout & Typesetting @  
MELC Office  
Printed @  
Thawmsons Color Press,  
H. Lamka*